

**Kalaallit Nunaanni pinerluttulerinermi inatsisip aamma Kalaallit Nunaanni
eqqartuussisarneq pillugu inatsisip (Kinguaassiuutitigut pinerluttarnerit il.il.)
allanngortinneri pillugit inatsisissatut siunnersuummut missingiummut
Namminersorlutik Oqartussat isumaqataanissaat pillugu Inatsisartut
aalajangiiffigisassaattut siunnersuut.**

pillugu

Inatsisinut Ataatsimiititaliap

siunnersuutip aappassaaneerneqarneranut

ISUMALIUTISSIISSUTAA

Ataatsimiititaliap suliarinninnermini ilaasortarai
Inatsisartunut ilaasortaq Anders Olsen, Siumut, Siulittaasoq
Inatsisartunut ilaasortaq Sofia Geisler, Inuit Ataqtigiit, Siulittaasup tullia
Inatsisartunut ilaasortaq Aleqa Hammond, Nunatta Qitornai
Inatsisartunut ilaasortaq Justus Hansen, Demokraatit
Inatsisartunut ilaasortaq Stine Egede, Inuit Ataqtigiit

1. Siunnersuut tunuliaqutaalu pillugit

Kinguaassiuutitigut atonerluisarnermik pinerluutit pillugit pinerluttulerinermi inatsimmi
aalajangersakkanik pillaasarnermut inatsimmi allannguutiginneqarsimasunut
naleqqussaalluni nutarterinissaq inatsisissatut siunnersuummik siunertaavoq.

Pillaasarnermut inatsit pillugu siunnersuisoqatigiit isumaliutissiissutaat nr. 1534/2012
tunngavigalugu allannguutit Danmarkimi 2013-imi akuersissutigineqartut¹ matumani
pineqarput.

Inatsisissatut siunnersuummut aamma Meeqqat kinguaassiuutitigut
iluautissarsiuutigineqartarnermut kinguaassiuutitigullu atonerlunneqartarnermut

¹ Inatsit nr. 633, 12. juni 2013-imeersoq

illersorneqarnissaat pillugu Europarådip isumaqatigiissutaanik danskit atortuulersitsinissaannik periarfissaqalersitsisumik pillaasarnermut inatsimmi allannguutit 2009-mi akuersissutigineqartut² ilaat aalajangersimasut ilanngutsinneqarput.

2. Siunnersuutip ilaa, pillaasarnermut inatsisip 2009-mi allannguutaanik ilanngutsitsisoq pillugu; allannguutit meeqqat kinguaassiuutitigut iluaqutissarsiutigineqartarnermut kinguaassiuutitigullu atornerlunneqartarnermut illersorneqarnissaat pillugu Europarådip isumaqatigiissutaanik danskit atortuulersitsinissaannik periarfissaqalersitsinissamik siunertaqartut.

Meeqqat kinguaassiuutitigut iluaqutissarsiutigineqartarnermut kinguaassiuutitigullu atornerlunneqartarnermut illersorneqarnissaat pillugu Europarådip isumaqatigiissutaanik danskit atortuulersitsinissaat periarfissinniarlugu pillaasarnermut inatsit 2009-mi allanngortinneqarpoq.

Meeqqat kinguaassiuutitigut iluaqutissarsiutigineqartarnermut kinguaassiuutitigullu atornerlunneqartarnermut illersorneqarnissaat, pisinnaatitaaffiit meeqqanut kinguaassiuutitigut iluaqutissarsiutigineqarsimasunut kinguaassiuutitigullu atornerlunneqarsimasunut atugassiissutigineqartut illersorneqarnissaat kiisalu meeqqat kinguaassiuutitigut iluaqutissarsiutigineqartarnerannik kinguaassiuutitigullu atornerlunneqartarnerannik akiuiniarluni nunami namminerminunallu tamalaat akornanni suleqatigiinnerup siuarsarneqarnissaa pingaarnertut siunertaasut isumaqatigiissummi erserpoq.

”Meeqqat” isumaqatigiissummi paasinnineq malillugu tassaapput inuit 18-it inorlugit ukiullit.

Isumaqatigiissutip imarisai isumaliutissiissummut matumunnga ilanngussaq 1-imi erseqqinnerusumik nassuiaatigineqarput.

Pillaasarnermut inatsimmik allannguinerup siullertut nassataraa, kinguaassiuutitigut atoqatigiinnermut tunngasunik atortussanik meeqqanit peqataaffigineqartunik tigummiqartarnermut aalajangersakkap³ annertusineqarnera, taamaalilluni aamma pisunut inummut piaaraluni internetikkut il.il. kinguaassiuutitigut atoqatigiinnermut tunngasunik atortussanik meeqqanit peqataaffigineqartunik pissarsisumut atuuttunngortinneqarluni, tamanna aamma atortussat pineqartut pineqartup qarasaasiaani

² Lov nr. 319 af 28. april 2009

³ § 235, imm. 2

toqqortaatineqanngikkaluarpata, atortussallu pissarsiarineranni akiliuteqartoqarsimannikkaluartoq.

Pillaasarnermut inatsimmut aalajangersakkamik nutaamik⁴, kinguaassiuutitigut atoqatigiinneq pillugu isiginnaartitsinermi assersuutigalugu stripteasemik takutitsinermi inummik sulii 18-inik ukioqalersimannigsumik peqataatitsinerup, tamatumunngaluunniit nammineq peqataanerup imaluunniit iluaqutissarsiutiginninnerup pillaatisiaqaataasinnaalerneranik nassataqartumik ikkussisoqarnera pillaasarnermut inatsimmik allannguinerup aappaattut nassataraa. Aammattaaq isiginnaartitsinerneq taamaattunik isiginnaarneq aalajangersakkakut pillaatisiaqaataasinnaalerpoq.

Allannguutit assingusut Kalaallit Nunaanni pinerluttulerinerneq inatsimmut ilanngutsinneqarnerat siunnersuutip matuma nassataraa, tak. inatsisissatut siunnersuummi § 1, nr. 14 aamma nr. 18.

Kalaallit Nunaata, tamanna pisariaqartinneqarpat, meeqqat kinguaassiuutitigut iluaqutissarsiutigineqartarnermut kinguaassiuutitigullu atonerlunneqartarnermut illersorneqarnissaat pillugu Europarådip isumaqatigiissutaanut kingusinnerusukkut ilannguffiginnissinnaaneranut aalajangersakkat taakku marluk piumasaqaataasut inatsisissatut siunnersuummut matumunnga nassuiaatini erseqqissaatineqarpoq.

Siunnersuummili atortussanik kinguaassiuutitigut atoqatigiinnermut tunngasunik meeqqanit peqataaffigineqartunik tigummiaqarnermut inerteqquteqarnerup aamma pisunut piaaraluni internetikkut il.il. atortussanik kinguaassiuutitigut atoqatigiinnermut tunngasunik meeqqanit peqataaffigineqartunik pissarsisumut, tamanna aamma atortussat toqqortaatineqanngikkaluarpata, atortussallu pissarsiarineranni akiliuteqartoqarsimannikkaluarpata atuuttunngortillugu annertusineqarnissaanik aalajangersakkamut tunngatillugu paasisutissaq taanna eqqortuunngilaq.

Taamaalilluni piaaraluni paasisutissiisarnermut attaveqatigiittarnermullu atortulersuutitigut atortussanik kinguaassiuutitigut atoqatigiinnermut tunngasunik meeqqanit peqataaffigineqartunik pissarsinerup pillaatisiaqaataasinnaalernissaanik piumasaqaammik naalagaaffiit tamakkiisumik ilaannakortumilluunniit nangaanartoqartitsinissaminnut periarfissaqartut isumaqatigiissummi artikel 20-mi erserpoq.

Aalajangersakkanik taaneqartunik atuutilersitsineq namminerminik Kalaallit Nunaata Europarådip isumaqatigiissutaanut ilannguffiginnissinnaaneranut tunngavissiisinnaaneranut *naammattariaqanngitsoq* tassunga ilanngunneqassaaq.

⁴ § 235 a

Kalaallit Nunaata isumaqatigiissummut ilannguffiginnissinnaaneranut Kalaallit Nunaanni inatsisit atuuttut isumaqatigiissummi piumasqaatinut naapertuuttuunissaat piumasqaataavoq.

Ilisimaneqartutut qanoq taamaattoqartiginera pillugu nalilersuisoqarnikuunngilaq.

Taamaalilluni isumaqatigiissummut ilannguffiginnissinnaaneq kalaallit meeqqat kinguaassiuutitigut atornerlunneqarnissamut inatsisitigut illersugaanerisa malunnaatilimmik nukittorsarneqarneranik nassataqassanersoq qularnaateqarsinnaavoq.

Isumaqatigiisstinulli taamaattunut ilannguffiginninneq nunani tamalaani meeqqat pisinnaatitaaffiisa siuarsarneqarneranni meeqqanillu kinguaassiuutitigut kanngutsaatsuliorfiginnittarnernik akiuiniarnermi anguniakkannik Kalaallit Nunaata tapersiineranik nunani tamalaani inuiannut inuiannullu kalaallinut ersersitsinerusinnaavoq.

Tassungali atatillugu malugeqquneqarpoq Kalaallit Nunaat 'Meeqqat tunineqartarnerat, akilersittartutut kinguaassiuutitigut atugaasarnerat kinguaassiuutitigullu kanngunartumik atugaasarnerat pillugu meeqqap pisinnaatitaaffii pillugit FN-p (Naalagaaffiit Peqatigiit) isumaqatigiisutaanut Protokolimut nammineq toqqagassamut' ilannguffiginninnikummat. Inatsisartut 2007-imi upernaakkut ataatsimiinneranni Inatsisartut tamanna aalajangiuppaat, Danmarkimillu oktober 2016-imi atuutilersinneqarluni (Kalaallit Nunaannut tunngatillugu nangaanartoqartitsinerup atorunnaarsinneqarneratigut).

3. Siunnersuutip ilaa, pillaasarnermut inatsisip 2013-imi allannguutaanik ilanngutsitsisoq pillugu pillaasarnermut inatsit pillugu siunnersuisoqatigiit, Straffelovsrådip isumaliutissiissutaa nr. 1534/2012 tunngavigalugu allannguutit.

Inatsisissatut siunnersuut pingaarnertut ukuninnga immikkoortoqarpoq:

Ilaquttanik kinguaassiuutitigut atoqateqartarneq

Ilaquttatut (qanigilluinnakkamik) kinguaamigut qanigisamik imaluunniit qatannummik atoqateqarneq pinerluttulerinermi inatsimmi § 74 malillugu inatsisinik unioqqutitsineruvoq.

Ilaatigut qitornavissiarisamik, qitornassamik qitornarsiaminilluunniit kinguaassiuutitigut atoqateqarneq, qitornavissiaq, qitornassaq qitornarsiarluunniit 18-it inorlugit ukioqarpat pinerluttulerinermi inatsimmi § 80 imm. 2 malillugu inatsisinik unioqqutitsineruvoq.

Pinerluttulerinermi inatsimmi § 74-imi ilaqtumik qanigisamik kujanninnermut allatulluunniit ittumik kinguaassiuutitigut atoqatiginninnermut inerteqquteqarneq annertusineqarpoq taamaalilluni qitornavissianut tunngatillugu aamma atuutsinneqalerluni.

Tamatuma kinguneratut siunnersuutip nassataraa, pinerluttulerinermi inatsimmi § 80 imm. 2-mi, 18-it inorlugit ukiulimmik qitornavissiamik, qitornassamik qitornarsiamilluunniit il.il kinguaassiuutitigut atoqatiginninnermut tunngasumi qitornavissiamut innersuussinerup peerneqarnera.

Siunnersuut malillugu qitornavissiamik atoqateqarnermut tunngasup siunissami § 80, imm. 2-miigunnaarluni § 74-imut ilanngutsinneqarnerata qitornavissianik inersimasunik kinguaassiuutitigut atoqateqarnerup inatsisunik unioqqutitsininngornera nassatarissavaa.

Imminut ikioriarsinnaangitsumik, inuup niaqulaarnera imaluunniit eqqarsartaatsimigut innarluuteqarnera imaluunniit inuup atorfimminik imaluunniit aningaasatigut pinngitsuuisinnaanginneranik atornerluerujussuarluni atoqateqartarneq

Pinerluttulerinermi inatsimmi § 77, imm. 1, nr. 2, *inummik katissimanngisamik* iliutsimut - assersuutigalugu aalakoourujussuarnermik pissuteqartumik - akerlileeriarsinnaangitsumik kinguaassiuutitigut atoqateqarnermut inerteqquteqarpoq.

Pinerluttulerinermi inatsimmi § 78, imm. 1 malillugu inuup niaqulaarnera imaluunniit eqqarsartaatsimigut innarluuteqarnera atornerlullugu pineqartumik *katissimanngisamik* kinguaassiuutitigut atoqatiginninneq inerteqqutaavoq.

Kiisalu pinerluttulerinermi inatsimmi § 78, imm. 2 malillugu inuup atorfimminik imaluunniit aningaasatigut pinngitsuuisinnaanginneranik atornerluerujussuarluni *katissimanngisaminik* kinguaassiuutitigut atoqatiginninneq inerteqqutaavoq.

Siunnersuut inerteqqutit taaneqartut annertusineqarnerannik nassataqarpoq, taamaalilluni katinnikut akornanni atuutsinneqalerlutik.

Katissimasunut atuutsitsinnginneq, taamatullu aappariittut akunnermi pisussaaffigeqatigiinneq qanga aappariinnermik isiginneriaatsimit amiakkutut ullutsinnut naleqqukkunnaarsimasutut nunami maani amerlanerpaanit aamma isumaqarfigineqarsinnaagunarpoq. Taamaalilluni atuutsitsinnginnerit pineqartut ukiut kingulliit ingerlaneranni naalakkersuinikkut sulinermi isiginiarneqarsimapput (isornartorsiorneqarsimallutillu⁵).

Pinerluttulerinermi inatsimmi § 78, imm. 2-mi aalajangersakkamut tunngatillugu inuup atorfimminik imaluunniit aningaasatigut pinngitsuuisinnaanginneranik atornerluerujussuarluni katissimanngisaminik kinguaassiuutitigut atoqateqartarnermut tunngasoq annertusineqarpoq taamaalilluni *passunneqarnermik paaqqutarineqarnermilluunniit pinngitsuuisinnaangissusianik* ilanngutsinneqarluni.

⁵ § 37-tunngavigalugu apeqquteqaat nr. 106/2013, nr. 191/2013, nr. 199/2013, kiisalu nr. 234/2015, tamarmik akissuteqarfigineqarsimasut.

Ulloq unnuarlu paaqqinnittarfimmi kiffaangissusiagaasimasut il.il. sulisut inissisimasullu akornanni kinguaassiuutitigut atoqatigiittarneq

Pinerluttulerinermi inatsimmi §78, imm. 3 malillugu ulloq unnuarlu paaqqinnittarfimmi, meeqqanik inuusuttunillu inissiisarfimmi, tarnikkut nakorsarneqarfittut immikkoortumi, tarnikkut annertuumik innarluutilinnik assigisaannilluunniit ulloq unnuarlu inissiisarfimmi atorfilittut nakkutilliisutulluunniit inissiisarfimmi inissisimasumik atoqatiginninneq inerteqqaavaoq.

Siunnersuutip nassatarisaanik aalajangersagaq taanna annertusineqarpoq, taamaalilluni inuit kiffaangissusiagaasut politiinillu nakkutigineqartut, pinerluttunik isumaginnittoqarfiup inissiisarfii inissinneqarsimasut ilanngunneqarlutik, soorluttaaq aamma annertuumik innarluutilinnik ulloq unnuarlu paaqqinnittarfimmi inissisimasut ilanngutsinneqarnerat erseqqissaatigineqartoq.

Kalaallit Nunaanni Pinerluttunik Isumaginnittoqarfiup tusarniaanermut akissummini misiliutaasumik iperagaasimasut Kiffaangissuseqarluni Pinerluuteqarsimasunik Isumaginnittoqarfiup ataani nakkutigineqartut ilanngutsillugit annertusineqarnissaa kaammattuutigisimagaa Inatsisinut Ataatsimiititaliap maluginiarpaa. Taamaalilluni Kiffaangissuseqarluni Pinerluuteqarsimasunik Isumaginnittoqarfimmi sulisup inatsisinik unioqqutitsinani piomasaaqatitalimmik, maleruarneqarneri isumaginnittoqarfimmit nakkutigineqartumik misiliummik iperagaasumik kinguaassiuutitigut atoqateqartarnera Kalaallit Nunaanni Pinerluttunik Isumaginnittoqarfiup ajornartorsiutitut nalilerpaa.

Justitsministeriap tusarniaanermut akissummut oqaaseqaataani, aalajangersakkap misiliummik iperagaasunut Kiffaangissuseqarluni Pinerluuteqarsimasunik Isumaginnittoqarfimmit nakkutigisassangortinneqarsimasunut aamma atuuttunngorlugu annertusineqarnissaa Justitsministeriamit pitsaasutut nalilerneqanngitsoq oqaatigineqarpoq. Pinerluttulerinermi inatsimmi killiliinerup danskit pillaasarnermut inatsisaanni killiliinermut, pillaasarnermut inatsit pillugu siunnersuisoqatigiit isumaliutissiissutaannik tunngavilimmu assingusariaqarneranut ministeria innersuussivoq.

Pillaasarnermut inatsimmik kunnqip peqqussuteqarneratigut Kalaallit Nunaannut atuutsilersitsineq pineqarani Kalaallit Nunaanni namminermi inatsit pineqarmat - ilusilersuineq eqqarsaatigalugu pillaasarnermut inatsimmi aalajangersakkanik saneqqutsinissamik Namminersorlutik Oqartussanit kissaataasinnaasut akuerineqarnissaannut periarfissaqarsinnaavoq, tamanna aamma kissaatit kalaallit Nunaanni immikkut pissutsinik tunngavilersorneqanngikkaluarpataluunniit.

Inatsisinut Ataatsimiititaliap paasivaa, pillaasarnermut inatsimmi aalajangersakkamik, aamma inunnut Kiffaangissuseqarluni Pinerluuteqarsimasunik Isumaginnittoqarfimmit nakkutigineqarlutik utaqqisitamik pineqaatissinneqarsimasunut imaluunniit misiliummik iperagaasunut piomasaaqatit Kiffaangissuseqarluni Pinerluuteqarsimasunik Isumaginnittoqarfimmit nakkutigineqartunut atuuttunngorlugu annertusititsinissamut pillaasarnermut inatsit pillugu siunnersuisoqatigiit tunngavissarsisimangitsut. Taamaalilluni siunnersuisoqatigiiffik isumaqarpoq inuit tigummisaanngitsut kisiannili Kiffaangissuseqarluni Pinerluuteqarsimasunik Isumaginnittoqarfimmit nakkutigineqartut

inunnut Pinerluttunik Isumaginnittoqarfiup inissiisarfiini kiffaanngissusiiagaasunut sanillersuunneqarsinnaanngitsut⁶.

Inatsisinulli Ataatsimiititaliap aamma paasivaa. utaqqisitamik pineqaatissiisummi piumasagaatinik imaluunniit piumasagaatitalimmik misiliummik iperagaanermi piumasagaatinik unioqqutitsinerusinnaasut, pisoq apeqqutaalluni kiffaanngissusiiagaanermik kinguneqarsinnaasut. Takorloorneqarsinnaavoq Kiffaanngissuseqarluni Pinerluuteqarsimasunik Isumaginnittoqarfimmi atorfilik assersuutigalugu misiliummik iperagaasup tungaanut ima pissaaneqartigisinnaasoq allaat misiliummik iperagaqqasumik kinguaassiuutitigut atoqatigiinnikkut kiffartuussinernik pissarsiniarluni inissisimanini atornerlussinnaallugu.

Paaqqinnittarfinni inissinneqarsimasunut tunngatillugu Inatsisinut Ataatsimiititaliap paasivaa, aalajangersakkamit siunnersuutigineqartumit assersuutigalugu meeqqanik inuusuttunillu, ulloq unnuarlu paaqqinnittarfiit, tarnikkut nakorsarneqarfittut immikkoortut, tarnikkut annertuumik innarluutilinnik assigisaannilluunniit ulloq unnuarlu inissiisarfiit ilanngunneqarsimasut.

Taamaalillutik tarnikkut annertuumik innarluutilinnuinaanngitsoq allanilli annertuumik innarluutilinnut ulloq unnuarlu paaqqinnittarfiit aalajangersakkamit (ersarissumik) ilanngutsinneqarsimannngillat.

Inatsisinut Ataatsimiititaliap tamatumunnga atatillugu maluginiarpa, piumasutsimik tunngaveqarluni kinguaassiuutitigut atoqatigiittarnerit aalajangersakkakkut aamma ilanngutsinneqarsimasut pillaaasarnermut inatsit pillugu siunnersuisoqatigiit paasinninnerat malillugu tamanna aalajangersimaqqinnaartunut, sulisut paaqqinnittarfimmilu inissisimasut akornanni sakkortuumik pinngitsoorsinnaajunnaarinniffiusartunut tamatumalu nassataanik inissisimasup immikkut qajannartumik inissiffigisartagaanut killilerneqartariaqartoq⁷.

Tamatumani isumaliutigineqarsinnaavoq tarnikkut annertuumik innarluutilinnit allaanerusunik annertuumik innarluutilinnik ulloq unnuarlu paaqqinnittarfimmi amerlanertigut sulisumik sakkortoorujussuarmik pinngitsuuisinnaajunnaartoqartartoq.

15-it 17-illu akornanni ukiullit assinginik kinguaassiuutitigut atoqatigiinnermut tunngasunik il.il. pigisaqartarnej

Pinerluttulerinnermut inatsimmi § 85, imm. 2-mi 18-it inorlugit ukiullit assinginik kinguaassiuutitigut atoqatigiinnermut tunngasunik imaluunniit filmilianik assigisaannilluunniit takusassianik kinguaassiuutitigut atoqatigiinnermut tunngasunik pigisaqarnermut inerteqqut § 85, imm. 3-mit sanioqqunneqarpoq. Taamaalilluni 15-it sinnerlugit ukiullip assinginik kinguaassiuutitigut atoqatigiinnermut tunngasunik pigisaqarnej, pineqartoq pigisaqartoqarnissaanut akuersaarsimappat inerteqqutaanngilaq. Siunnersuut atuutsitsinnginnerup assinut isiginnaagassianullu tunngasuuneranik

⁶ Pillaasarnermik inatsit pillugu siunnersuisoqatigiit isumaliutissiisutaanni nr. 1534/2012, qup. 297.

⁷ Pillaasarnermik inatsit pillugu siunnersuisoqatigiit isumaliutissiisutaanni nr. 1534/2012, qup. 295.

erseqqissaateqarpoq, taamatullu akuersaernerup qaqugukkulluunniit atorunnaarsinneqarsinnaanerani.

Taamaalilluni assersuutigalugu 17-inik ukiullip angutaanni/arnaanni nammineq assiminik kinguaassiuutitigut atoqatigiinnermut tunngasunik tunippagu, tunissummik tigusineq aappaasumut suli inatsisinik unioqqutitsinerussanngilaq, niviarsiararli assersuutigalugu aappariit qimannerat pissutigalugu kingorna peqqissimippat, assimik tigungminniinnarneq aappaasimasumut inatsisinik unioqqutitsininngussaaq.

18-it inorlugit ukiulimmik kinguaassiuutitigut atoqatigiinnermut tunngasunik assiliineq, filmiliorneq assigisaannillu iliorneq, assilisat tuniniarnissaat allatulluunniit iliorluni siaruarternissaat siunertaralugu.

Pinerluttulerinermi inatsimmi § 85, imm. 4, 18-it inorlugit ukiulimmik kinguaassiuutitigut atoqatigiinnermut tunngasunik, assilisat tuniniarnissaat allatulluunniit siaruarternissaat siunertaralugu assiliinnermut, filmiliornermut assigisaannillu iliornermut inerteqqummik imaqarpoq.

Inerteqquteqarnerup annertusitinneqarnera siunnersuutip nassataraa, taamaalilluni pisuni assilisittup imaluunniit filmiliaritittup 18-it inorlugit ukioqarnerani immiussisup/assiliisup ilisimasaqarnerani taamaallaat atuunnani aammattaaq pineqartup tamatuminnga nassuerutiginnissimasariaqaraluarnerani atuutilerluni.

Atortittartoqarneq

Pinerluttulerinermi inatsimmi § 81 malillugu 18-it inorlugit ukiulimmik akiliilluni akiliinissamilluunniit neriorsuilluni kinguaassiuutitigut atoqateqarneq inerteqqutaavoq, pineqartup 18-it inorlugit ukioqarnera nalusimanngikkaanni nassuerutiginnissimasariaqaraluaanniluunniit.

Aalajangersakkamik tamatumunnga peqataanermut attuumassutilimmik ilanngussisoqarnera siunnersuutip nassataraa.

Pinerluttulerinermi inatsimmi § 83 (Iluanaarniutigalugu atortittartuutitsinermut tunngasoq) ilaatigut atortittarfimmik ingerlatsineq imaluunniit akunnittarfimmi ineeqqamik atortittartuunermik ingerlatsinermut attartortitsineq inerteqqutaavoq.

Aalajangersakkap nutaamik oqaasertalerneqarnera siunnersuutip nassataraa.

Nammineerluni atortittartuuneq suli inatsisinik unioqqutitsinerussanngilaq, kisianni – paasiuminartumik oqaatigalugu – allat atortittartuunerannik aningaasarsiuuteqarneq inatsisinik unioqqutitsineruvoq.

Siunnersuutip pingaarnertut nassataraa, iluanaarniutigalugu atortittartuutitsinermit taasamik atortittarfimmik ingerlatsineq kisimi pineqarunnaarluni aammattaaq imerniartarfinni

atortittartuunermik ingerlatsineq, sianerfigalugu pissarsiarineqarsinnaasutut atortittartuuneq (escortprostitution) aqqusinermilu atortittartutut ingerlatsineq pineqalernerat.

Atortittartuuneq atortittarfimmillu ingerlatsineq pillugit aalajangersakkat siunnersuutigineqartut sunniuteqangaatsiarnissaat naatsorsuutigineqarsinnaagunangilaq, tassami nalinginnaasumik atortittartoqartarnek nunami maani siaruaasimasuunngimmat.

Meeqqanik 12-it inorlugit ukiulinnik kinguaassiuutitigut atoqateqartarnek
Pinerluttulerinermi inatsimmi § 77, pinngitsaaliilluni atoqateqartarnermut tunngasuvoq. Nakuuserluni imaluunniit nakuusernissaq soorasaarutigalugu pinngitsaaliilluni atoqatiginninneq (§77, imm. 1) aalajangersakkami ilaatinneqarpoq, allatulluunniit unioqqutitsilluni pinngitsaaliilluni kinguaassiuutitigut atoqatiginninneq (§ 77, nr. 3). Aammattaq inummik (katissimanngisamik) iliutsimut akerlileeriansinnaanngitsumik pinngitsaaliilluni kinguaassiuutitigut atoqateqarnek pinngitsaaliisarnek pillugu aalajangersakkami ilaatinneqarpoq (§ 77, nr. 2).

Pinerluttulerinermi inatsimmi § 79, malillugu meeqqamik kinguaassiuutitigut atoqateqarsinnaanermut ukiukinnerpaaffiliussat inorlugit ukiulimmik, tassa 15-it inorlugit ukiulimmik kinguaassiuutitigut atoqatiginninneq inerteqqutaavoq, pinerluuteqartup meeqqap ukiui nalusimangippagit, tamatuminnгалuunniit nassuerutiginnissimasariaqaraluarluni.

Siunnersuutip nassataaraa pinerluttulerinermi inatsimmi § 77-imi pinngitsaaliisarnek pillugu aalajangersakkap, meeqqanik 12-it inorlugit ukiulinnik atoqateqarnermut atuuttunngorluni annertusineqarnera. Tamatuma kinguneranik meeqqanik 12-it inorlugit ukiulinnik atoqateqarnek pinerluttulerinermi inatsimmi § 79-imi, kinguaassiuutitigut meeqqanik atoqateqartarnermut tunngasumi ilaatinneqarunnaassaaq.

Tamatuma nassataaraa meeqqamik 12-it inorlugit ukiulimmik kinguaassiuutitigut atoqateqarnek pinngitsaaliilluni atoqateqarnermut nalilerneqarnera, tamanna aamma nammineq piumassuseq tunngavigalugu atoqatigiinnerusimagaluarpat.

Inatsimmut nassuiaatini aalajangersagaq pillugu allassimavoq, pinerluutip peqqarniitsup pinngitsaaliilluni atoqateqarnermut sanillersuunneqarsinnaasup pineqarnerata erseqqissaatigineqarnissaa tamatuminna siunertaasoq.

Nammineq piumassutsimik tunngaveqarluni kinguaassiuutitigut atoqatigiinnerup pinngitsaaliilluni atoqateqarnermut aalajangersakkamut ilanngutsinneqarnera paasinnittaatsikkut isumatusaannginnerusorinarsinnaavoq nalinginnaasumillu oqaatsinik atuinermi siunertaqanngissorinarsinnaalluni; nalaanneqarsinnaanngitsoq.

Pilaasarnermi inatsit pillugu siunnersuisoqatigiit isumaliutissiissutaanni erserpoq, taamaattoqarnerata aalajangersakkamik taamaattumik atuutsitsilinnginnissap pitsaaneruneranik nassataqarnera siunnersuisoqatigiinnit eqqumaffigineqartoq.

Taamaattorli pilaasarnermik inatsit pillugu siunnersuisoqatigiit pingaartippaat, inummut [pineqaatissinneqarsinnaanermut naammattunik ukiulimmut] meeqqamik 12-it inorlugit ukiulimmik atoqateqarniarnermi pinngitsaaliinissaq tamatuminnгалuunniit qunusaarinissaq nalinginnaasumik pisariaqarnaviannitsoq, tassami siunnersuisoqatigiit isumaat malillugu kujanneq taamaattoq ajortuliortup timikkut tarnikkullu nakuuneruneratigut nalinginnaasumik iluatsinneqarsinnaassammat.

Taamaattorli isumaliutissiisummi aamma erserpoq, pilaasarnermik inatsit pillugu siunnersuisoqatigiinnit eqqumaffigineqartoq, assersuutigalugu meeqqap 15-inik ukiullip meeqqallu 12-inik ukioqalinngitsiartup, timikkut tarnikkullu inerissimalluurtup kinguaassiuutitigut atoqatigiittarnerat nalaanneqartarsinnaammat, tamanna nammineq piomassutsimik tunngaveqartumik naligiillu akornanni iliuuseqarnertut isumaqarfigineqarsinnaasumik, taamaalillunilu atoqatigiittarnerup taassuma “pinngitsaaliilluni atoqateqarnertut” nalilernissaa naapertuussorinarpallaarani.

Nalaatalli taamaattut qaqutigoortorujussuuneri pillaasarnermik inatsit pillugu siunnersuisoqatigiinnit ilimagineqarpoq.

Nalaatat taamaattut qaqutigoortorujussuunerisa qanoq ilimagineqarsinnaatiginera ilisimaneqanngilaq. HBSC-p meeqqat atuarfiini misissuisarnerisa paasinarsisinnikuuaat Kalaallit Nunaanni meeqqat kinguaassiuutitigut atoqatigiinnermik misileeqaartut Danmarkimi misileeqaartunit malunnaatilimmik ukiukinnerusartut.

Health Behaviour in School-aged Children, HBSC-p Kalaallit Nunaanni 2006-imi misissuinerani apersorneqartut 29%-iisa (taakkunanga niviarsiaqqat 20 %-iisa) 13-inik ukioqarlutik pernaammik kinguaassiuutitigut atoqateqarsimallutik nalunaarutigaat. 16 %-iisa 12-inik ukioqarlutik misileeqaarsimallutik nalunaarutigaat, 5 %-iisa 11-inik ukioqarlutik tassanngaluunniit siusinnerusukkut kinguaassiuutitigut atoqateqarsimallutik nalunaarutigaat.

Oqaasertalersuinernik ullutsinnut naleqqukkunnaarsimasunik taaguusersuinikkut paasiuminarsaallunilu naleqqussaaneq

Pingaarnertut imarisat qulaani nassuiaatigineqartut saniatigut pinerluttulerinermi inatsimmi aalajangersakkat ilaasa oqaatsit ullutsinnut naleqqunnerusut atorlugit oqaasertalerneqarnerat inatsisissatut siunnersuutip nassataraa. Tamanna ilaatigut pinerluttulerinermi inatsimmi § 93-imi inunnik nioqquteqartarnermut tunngasumut kiisalu § 84-imi kanngutsaatsuliorfiginnittarnermut tunngasumut atuuppoq.

Pinerluttulerinermi inatsimmi kinguaassiuutitigut pinerluuteqartarneq pillugu kapitalimi aalajangersakkat arlallit (immikkut isigalugit) taamaallaat inunnut suaassuseqatiginngisanut pissusilersuutinut tunngasuupput. Aalajangersakkalli taakku pinerluttulerinermi inatsimmi §82-imut malitsitut aamma suaassuseqatinut iliuuserisanut tunngatillugu atorneqartarput. § 82-ip atorunnaarsinneqarnera siunnersuutip nassatarissavaa, aalajangersakkallu pineqartut suaassuseqammik kinguaassiuutitigut atoqateqartarnermut aamma atorneqartassapput.

Tamatumanili piunasaqaataavoq pinerluttulerinermi inatsimmi taaguut “kujanneq” siunissami aamma itikkut kujannermut atorneqartalernissaa.

Eqqartuussisarnermik inatsimmik allanngineq: eqqugaasimasunut illersuisunngortitsineq

Kiisalu Kalaallit Nunaanni eqqartuussisarnermik inatsimmi pinerluttulerinermi inatsimmi § 93-imi inunnik niueruteqarnermut tunngasoq malillugu ajortuliorfigineqartunut illersuisunngortitsisinnaaneq periarfissiissutigineqassasoq siunnersuutigineqarpoq.

Illersuisoq assersuutigalugu isumaginnittoqarfimmi suleqataasusinnaavoq.

4. Inatsisinut Ataatsimiititaliap inassuteqaataa

Ataatsimiititaliap isumaqatigiittup siunnersuutip **akuersissutigineqarnissaa** inassutigaa.

Inatsisinut Ataatsimiititaliap taamatut oqaaseqaateqarluni siunnersuut
aappassaaniigassanngortippaa.

Anders Olsen
Siulittaasoq
Siumut

Sofia Geisler
Inuit Ataqtigiiit

Justus Hansen *Demokraatit*

Stine Egede
Inuit Ataqtigiiit

Aleqa Hammond
Nunatta Qitornai

ILANNGUSSAQ 1

Meeqqat kinguaassiuutitigut iluaqutissarsiuutigineqartarnermut kinguaassiuutitigullu atonerlunneqartarnermut illersorneqarnissaat pillugu Europarådip isumaqatigiissutaa – Isumaqatigiissutip imarisaanik takussutissiaq

Isumaqatigiissummi kapitali 1 (artikel 1-3) ilaatigut isumaqatigiissutip siunertaanik killiliussaannullu aalajangersakkanik imaqarpoq. Tassani ilaatigut ersippoq “meeraq” isumaqatigiissummi paasinnineq malillugu tassaasoq inuk 18-it inorlugit ukiulik.

Kapitali 2 (artikel 4-9) meeqqanik kinguaassiuutitigut iluaqutissarsiuutiginnissinnaanerup meeqqanillu kinguaassiuutitigut atonerluisarnerup pinaveersaartinneqarnissaanut suliniutit pillugit aalajangersakkanik imaqarpoq, tassani aamma meeqqat inunnit sulinerminni meeqqanut atassuteqartartunit ilinniartinneqarnerannut meeqqallu attuumassutillit pillugit aalajangiiniarnerni peqataatinneqartarnerannut il.il.

Kapitali 3 (artikel 10) meeqqanik kinguaassiuutitigut iluaqutissarsiuutiginnissinnaanerup meeqqanillu kinguaassiuutitigut atonerluisarnerup pinaveersaartinneqarnissaanut suliniutit pillugit ataqatigiissaarinnermut suleqatigiinnermullu nunami namminerme iliuutsit qulakkeerneqarnissaannut tunngassuteqarpoq.

Kapitali 4 (artikel 11-14) kinguaassiuutitigut iluaqutissarsiuutigineqarnermik imaluunniit atonerlunneqarnermik eqqugaasimasut tapersorneqarnissaannut illersorneqarnissaannullu iliuutsinut tunngassuteqarpoq. Ilaatigut meeqqamik isumaqatigiissummi ilanngunneqarsimasut ilaannik pinerluffiginnittoqarsimaneranik tunngavissaqartumik pasitsaassisoqarsimatillugu oqartussaasumut attuumassuteqartumut nalunaarutiginnittoqarnissaanik qulakkeerinnissamik naalagaaffiit kapitali 4-kkut pisussaaffilerneqarput. Pisuni angajoqqaat inuilluunniit meeqqamik isumaginnittuusut pinerlunnermut akuusimatillugit pinerluttup ilaqutariinniit qimagutsinneqarsinnaaneramik kiisalu pinerlineqartup piffissami aalajangersimasumi qimagutsinneqarsinnaaneramik qulakkeerinissamut naalagaaffiit kapitali 4-kkut pisussaaffilerneqarput.

Kapitali 5 (artikel 15-17) inuit isumaqatigiissummi imarineqartunik unioqqutitsilluni pinerluuteqarsimanerup pineqaatissinneqarsimasut paasiniaaffigineqartulluunniit iliuuseqarfigineqartarnerannut aalajangersakkanik imaqarpoq. Naalagaaffiit aamma meeqqanut pineqaatissinneqarsinnaanerup ukiutigut inuuttunut kinguaassiuutitigut kanngutsaatsuliortunut iliuusissanik tulluarsakkanik qulakkeerinnissapput.

Kapitali 6 (artikel 18-29) pillaasarnermut aalajangersakkanik imaqarpoq.

Artikel 18 naapertorlugu piaaraluni meeqqanik naalagaaffimmi namminerme inatsisitigut aalajangersakkat malillugit kinguaassiuutitigut atoqateqarsinnaanerup ukiukinnerpaaffissaliunneqartut inorlugit ukioqartunik peqataaffigineqartumik kinguaassiuutitigut iliuuseqarneq naalagaaffinnit pinerlunninngortinneqassaaq. Aammattaaq artikel 18 naapertorlugu ilaatigut piaaraluni pinngitsaaliilluni, pissaanermik atuilluni

imaluunniit qunusaaraluni meeqqamik kinguaassiuutitigut atoqateqarneq naalagaaffinnit pinerlunninngortinneqassaaq.

Ilaatigut inummik piaaraluni meeqqamik ussiataaraluni imaluunniit pinngitsaaliilluni atorittartunngortitsisumik, imaluunniit tamatuminnnga aningaasarsiuuteqartumik, imaluunniit meeqqamik atorittartuusumik piaaraluni akiliilluni kinguaassiuutitigut atoqateqartumik naalagaaffiit pinerlutunngortitsinissaat isumaqatigiisummi artikel 19-imi piumasaqaataavoq.

Artikel 20 kinguaassiuutitigut atoqatigiinneq pillugu meeqqanit peqataaffigineqartumik isiginnaagassialiortarnerup (børnepornografi) pinerlunninngortinnissaanut naalagaaffiit pisussaaffiit tunngassuteqarpoq. Aalajangersagaq malillugu ilaatigut kinguaassiuutitigut atoqatigiinneq pillugu meeqqanit peqataaffigineqartumik isiginnaagassialiorneq, tigummiarneq tunisinerlu pillaatisiaqaataasinnaassapput, tamanna aamma pisuni meeqqanit nunami namminermit inatsisit naapertorlugit atoqateqarsinnaanermut ukiukinnerpaaffiliussamit ukiukinnerusunit peqataaffigineqartumik kinguaassiuutitigut atoqatigiinneq pillugu isiginnaagassialiornermut/assialiornermut pigisaqarnermulluunniit atuuppoq, aamma pilersitsineq imaluunniit tigummiarneq taakku akuersaagaannik, namminerlu atugassaannartut pisimagaluarpat.

Aammattaaq paasissutissiisarnermut attaveqatigiittarnermullu atorulersuutitigut piaaraluni atoqatigiinneq pillugu isiginnaagassialianik meeqqanit peqataaffigineqartumik iserfiginninneq pillaatisiaqaataasinnaassaaq. Taamaattorli naalagaaffiit isumaqatigiisummi atorussanngortitsisimasut aalajangersakkamik taassuminnga nangaanartoqartitsinnaaneq periarfissarivaat.

Atisaajarluni qitittartutut isiginnaartitsinermut allatullu meeqqanit (18-it inorlugit ukiulinnit) peqataaffigineqartumik kinguaassiuutitigut atoqatigiinnermut tunngassuteqartumik isiginnaartitsisarnermut tunngassutillit assigiinngitsut pinerlunninngortinneqarnissaannik naalagaaffiit isumaqatigiisummi artikel 21-mit pisussaaffilerneqarput. Taamaallitutik naalagaaffiit isiginnaartitsinermik taamaattumik isiginnaartumik imaluunniit meeqqamik isiginnaartitsinermut taamaattumut peqataatitsisumik pillaasinnaassapput.

Isumaqatigiisummi artikel 22-p meeqqamik atoqateqarsinnaanermut ikiukinnerpaaffiliunneqarsimasunit ukiukinnerusumik kinguaassiuutitigut atoqatiginninnerup imaluunniit kinguaassiuutitigut atornerluinermik isiginnaartitsinerup pillaatisiaqaataalernissaannik qulakkeerinnissamik Naalagaaffiit pisussaaffilerpai.

Artikel 23 groomingimik taaneqartartumut tunngassuteqarpoq (tassa inersimasup atoqateqarnissaq siunertaralugu internetimi attaveqatigiittarfitsigoorlugu attaviginnilluni meeqqamik naapitsiniartoq).

Artikel 27 malillugu pinerluummik isumaqatigiisummi ilaatinneqartumik pinerluummut naapertuuttumik, pinerluutillu peqqarniissusia eqqarsaatigalugu pinerluuteqaqqinnissamut qunullernermik sunniuteqartumik kinguneqartitsisarnissamik qulakkeerinnissamik naalagaaffiit pisussaaffilerneqarput.

Kapitali 7-imi (artikel 30-36) meeqqanik kinguaassiuutitigut iluaqutissarsiuutiginninnerit meeqqanillu kinguaassiuutitigut atornerluinerit pillugit suliat paasiniaavigineqartarnerat eqqartuussisutigullu suliassanngortinneqartarnerat pillugit aalajangersakkanik ilanngussaqqarpoq. Kapitali ilaatigut maleruagassanik pillaatissiissutissiisinaanerup pisoqalisootarneranut suliallu ilaanni meeqqanik videokkoorlugu killisiuisarnermut tunngasunik imaqqarpoq.

Isumaqatigiissummi artikel 33 malillugu ilaatigut meeqqanik kinguaassiuutitigut atornerluinerimut, meeqqanik atorittartutut atugaqartitsinerimut, kinguaassiuutitigut atoqateqarnermut tunngasunik isiginnaartitsinerimut meeqqanik atuinerimut kiisalu atorussanik meeqqanik peqataaffigineqartunik kinguaassiuutitigut atoqatigiinnerimut tunngasut pillugit suliat pinerlineqartup imminut oqartussaaffigilernerata kingorna eqqartuussivitsigut suliassanngortinneqarsinnaalersillugit pisoqalisootarnerannik kinguartitsinissamik qulakkerinnissamik naalagaaffiit pisussaaffeqarput. Aammattaaq pisoqalisoonissamut killiliussaq pinerluutip pineqartup peqqarniissusaanut naammaginartumik naleqqersuunneqarsinnaassaaq.

Kapitali 8 (artikel 37) naalagaaffimmi kinguaassiuutitigut pinerluuteqartarnermik suliat pillugit paasisutissat katersorneqartarnerannut toqqortarineqartarnerannullu maleruagassanik imaqqarpoq.

Kapitali 9 (artikel 38) ilaatigut kinguaassiuutitigut atornerluisarnermik il.il. pinaveersaartitsinerimut, pinerlineqarsimasut illersorneqartarnerat ikiorsiivigineqartarnerallu pillugit pinerluutinillu isumaqatigiissummi ilaatinneqartunik paasiniaanermi naalagaaffiit suleqatigiinnerannut tunngavoq.

Kapitali 10 (artikel 39-41) isumaqatigiisut naapertorlugu nakkutiginittarnermut aqqissuussinerimut aalajangersakkanik imaqqarpoq.

Kapitali 11 (artikel 42-43) aalajangersakkanik isumaqatigiisutinut allanut attuumassuteqarnerimut tunngasuteqartunik imaqqarpoq.

Kapitali 12 (artikel 44) isumaqatigiisummik allannguinerimut periuseq najoqqutarineqartoq pillugu aalajangersakkanik imaqqarpoq.

Kapitali 13 (artikel 45-50) isumaqatigiissummi naggasiutitut aalajangersakkanik imaqqarpoq.